


魏異記

光緒紀元夏月湖
北崇文書局開雕



梁 任昉撰

昔盤古氏之死也頭為四岳目為日月脂膏為江海毛髮為草木秦漢間俗說盤古氏頭為東岳腹為中岳左臂為南岳右臂為北岳足為西岳先儒說盤古氏泣為江河氣為風聲為雷目瞳為電古說盤古氏喜為晴怒為陰吳楚間說盤古氏夫妻陰陽之始也今南海有盤古氏墓亘三百餘里俗云後人追葬盤古之魂也桂林有盤古氏廟今人祝祀

南海中盤古國今人皆以盤古為姓昉按盤古氏天地萬物之祖也然則生物始於盤古

南海小虞山中有鬼母能產天地鬼一產十鬼朝產之暮食之今蒼梧有鬼姑神是也虎頭龍足蟒目蛟眉蟒地日圓蛟眉連生今吳越

間防風廟土木作其形龍首牛耳連脊一目

昔禹會塗山執玉帛者萬國防風氏後至禹誅之其長三丈其骨頭專車今南中民有姓防風氏卽其後也皆長大越俗祭防風神奏防風古樂截竹長三尺吹之如嗥三人披髮而舞

軒轅之初立也有蚩尤氏兄弟七十二人銅頭鐵額食鐵石軒轅誅之於涿鹿之野蚩尤能作雲霧涿鹿今在冀州有蚩尤神俗云人身牛蹄四目六手今冀州人掘地得髑髏如銅鐵者卽蚩尤之骨也今有蚩尤齒長二寸堅不可碎秦漢間說蚩尤氏耳鬢如劍戟頭有角與軒轅鬪以角觝人人不能向今冀州有樂名蚩尤戲其民兩兩三三頭戴牛角而相觝漢造角觝戲蓋其遺製也

太原村落間祭蚩尤神不用牛頭今冀州有蚩尤川卽涿鹿之

野漢武時太原有蚩尤神畫見龜足虵首首疫其俗遂爲立祠
堯使鯀治洪水不勝其任遂誅鯀於羽山化爲黃熊奴來入於
羽泉今會稽祭禹廟不用熊曰黃熊卽黃熊也陸居曰熊水居
曰能昉按今江淮中有魃名熊熊虵之精至冬化爲雉至春復
爲虵今吳中不食雉毒故也

揚州有虵市市人鬻珠玉而雜貨蛟布蛟人卽泉先也又名泉
客

南海出蛟綃紗泉先潛織一名龍紗其價百餘金以爲服入水
不濡

南海有龍綃宮泉先織綃之處綃有白之如霜者

鬱林郡有珊瑚市海先市珊瑚樹碧色生海底一株十枝枝間
無葉大者高五六尺至小者尺餘蛟人云海上有珊瑚宮漢元

封二年鬱林郡獻瑞珊瑚

光武時南海獻珊瑚婦人帝命植於殿前謂之女珊瑚一旦柯葉甚茂至靈帝時樹死咸以謂漢室將亡之徵也

凡珠有龍珠龍所吐者虵珠虵所吐者南海俗諺云虵珠千枚不及玫瑰言虵珠賤也

玫瑰亦是美珠也

越人諺云種千畝木奴不如

一龍珠

越俗以珠爲上寶生女謂之珠娘生男謂之珠兒吳越間俗說明珠一斛貴如玉者合浦有珠市

昔炎帝女溺死東海中化爲精衛其名自呼每銜西山木石填東海偶海燕而生子生雌狀如精衛生雄如海燕今東海精衛誓水處曾溺於此川誓不飲其水一名鳥誓一名冤禽又名志鳥俗呼帝女雀

東海島龍川穆天子養八駿處也島中有草名龍芻馬食之一日千里古語云一株龍芻化爲龍駒

陶唐之世越裳國獻千歲神龜方三尺餘背上有文科斗書記開闢以來帝命錄之謂之龜歷伏滔述帝功德銘曰胡書龜歷之文

夏桀宮中有女子化爲龍不可近俄而復爲婦人甚麗而食人桀命爲蛟妾告桀吉凶

桀時泰山山走石泣先儒說桀之將亡泰山三日泣今泰山山石遠望之若人泣蓋是也周武謂周公曰桀爲不道走山泣石堯爲仁君一日十瑞宮中芻化爲禾鳳凰止於庭神龍見於宮沼歷草生堦宮禽五色鳥化白神木生蓮蓬蒲生厨景星耀於天甘露降於地是爲十瑞

東海畔有孤竹焉斬而復生中有管周武王時孤竹之國獻瑞
筍一株

空桑生大野山中爲琴瑟之最者空桑也

周成王元年貝多國人獻舞雀周公命返之南海中有軒轅巨
鸞自歌鳳自舞古云天帝樂也崆峒山中有堯碑禹碣皆籀文
焉伏滔述帝功德銘曰堯碑禹碣歷古不昧

會稽山有虞舜巡狩臺臺下有望陵祠帝舜南巡葬於九疑民
思之立祠曰望陵祠

帝舜都鄞門古宮存焉宮前有堯臺舜館銘記古文莫有識者
湘水去岸三十里許有相思宮望帝臺昔舜南巡而葬於蒼梧
之野堯之二女娥皇女英追之不及相與慟哭淚下沾竹竹上
文爲之斑斑然

昔戰國時魏國苦秦之難有民從征戍秦久不返妻思而卒既
葬塚上生木枝葉皆向夫所在而傾因謂之相思木今秦趙間
有相思草狀如石竹而節節相續一名斷腸草又名愁婦草亦
名霜草人呼爲寡婦莎蓋相思之流也

淮南有懶婦魚俗云昔楊氏家婦爲姑所溺而死化爲魚焉其
脂膏可燃燈燭以之照鳴琴博奕則爛然有光及照紡績則不
復明焉

水虺五百年化爲蛟蛟千年化爲龍龍五百年爲角龍千年爲
應龍

沮渙二水波文皆若五色彼人多文章故一名績水

灌淝之間離別亭古送別處漢沔會流處岸上有石銘云下至
水府三十一里皆傳云李斯刻此石

鹿千年化爲蒼又五百年化爲白又五百年化爲赤漢成帝時
山中人得赤鹿烹而視之骨皆黑色仙者說赤鹿爲脯食之壽
二千歲

餘干縣有白鹿土人皆傳千年矣晉成帝遣捕得銅牌在角後
書云漢元鼎二年臨江所獻白鹿

淮水中黃雀至秋化爲蛤春復爲黃雀雀五百年化爲蜃蛤
梓樹之精化爲青羊五百年而紅五百年而黃又五百年而色
蒼又五百年而色白

龜千年生毛龜壽五千年謂之神龜萬年曰靈龜

海魚千歲爲劍魚一名琵琶形如琵琶而善鳴因以名焉

漢中山有虎生角道家云虎千年則牙蛻而角生

漢宣城郡守封邵亘化爲虎食郡民呼之曰封使君因去不復

來故時語云無作封使君生來浴民死食民夫人無德而壽則
爲虎虎不食人人化虎則食人蓋恥其類而惡之

獍之爲獸狀如虎豹而小始生還食其母故曰鳥獍

濟陽山麻姑登仙處俗說山上千年金雞鳴玉犬吠

闔閭夫人墓中周迴八里別館洞房迤邐相屬漆燈照爛如日

月焉尤異者金蠶玉燕各千餘雙

吳王夫差築姑蘇之臺三年乃成周旋詰屈橫亘五里崇飾土
木殫耗人力宮妓數千人上別立春宵宮爲長夜之飲造千石
酒鍾夫差作天池池中造青龍舟舟中盛陳妓樂日與西施爲
水嬉吳王於宮中作海靈館館娃閣銅溝玉檻宮之楹檻珠玉
飾之

吳既滅越棲勾踐于會稽之上地方千里勾踐得范蠡之謀乃

示民以耕桑延四方之士作臺於外而館賢士今會稽山有越王臺今交州麻林一名紵林勾踐種麻將以弦弓交州糠頭山勾踐貯米於其上春積糠爲山今會稽之上有越王鑄劍洲箭鏃洲往往有得古箭鏃蓋古制也

廣州東界有大夫文種之墓墓下有石爲華表柱石鶴一隻種卽越王勾踐之謀臣也

洞庭湖中有釣洲昔范蠡乘扁舟至此遇風止釣於洲上刻石記焉有一陂陂中有范蠡魚昔范蠡釣得大魚烹食之小者放於陂中陂邊有范蠡石牀石硯鈇鏃范蠡宅在湖中多桑紵英果有海杏大如拳苦菜甘柚林石壁上鑿兵書十篇菰葑川皆范蠡手植之定陶有范蠡干斛魚陂木桃園酸棗林

梧桐宮在勾容縣傳云吳別館有楸梧成林焉梧子可食古樂

府云梧宮秋吳王愁是也

闔閭墓中石銘云吳王之夜室也嗚呼平吾君王棄吾之邦遷於重崗維崗之陽吾王之邦

今宜都有吳王射亭木棠苑木棠果名似梨而甜宜都七里溪吳王射堂堂之柱礎皆如伏龜袁宏宮賦曰海龜之礎是也

蒼頡墓在北海呼爲藏書臺周末發冢得方玉石上刻文八十字當時莫識遂藏之書府至秦時李斯識八字云上天作命皇辟迭王至叔孫通識十二字

瀨鄉石堂有老子篆書道德經五千字蔡邕於其旁以隸書證之

番禺有酸柿甜梅李尤果賦生物賦偏梅甜柿酸

漢章帝三年子母笄生白虎殿前時謂爲孝竹羣臣獻孝竹頌

越多橘柚園越人歲多橘稅謂橙橘戶吳書闕尙表請除臣之橘籍是也

越中有王氏之橘園胡氏之梅山賀氏之瓜邱吳中有陸家白蓮顧家斑竹趙有韓氏之酸棗

中山有楸戶掌楸木者楸子爲竹器漢書貨殖志千年楸

邯鄲有故宮基存焉中有趙王之果園梅李至冬而花春得而食

鄴中銅駝鄉魏武帝陵下銅駝石犬各二古詩云石犬不可吠銅駝徒爾爲

一說香水在并州其水香潔浴之去病吳故宮亦有香水溪俗云西施浴處人呼爲脂粉塘吳王宮人濯粧於此溪上源至今馨香古詩云安得香水泉濯郎衣上塵俗說魏武帝陵中亦有

泉謂之香水

饒州俗傳軒轅氏鑄鏡於湖邊今有軒轅磨鏡石石上常潔不生蔓草

桂林東南邊海有裸川桓譚新論云呈衣冠於裸川海上有裸人鄉

丹陽大姑陵陰下有石麟二枚不知年代傳云秦漢間公卿墓則以石麒麟鎮之

虞氏縣有盧君古塚塚旁栢二株枝條蔭茂二百餘步樹文隱起皆如龜甲根勁如銅石

盧府君墓在館陶縣南二十里不知何代銘曰盧府君歸真之室

盧陵郡有董氏之宅前有董家祠昔有董氏語其鄉人曰吾當